



Համարը N 187-Ն
Տիպը Որոշում
Սկզբնաղբյուրը ՀՀՊՏ 2013.03.13/14(954) Հոդ.198
Ընդունող մարմինը ՀՀ կառավարություն
Ստորագրող մարմինը ՀՀ վարչապետ
Վավերացնող մարմինը
Ուժի մեջ մտնելու ամսաթիվը 23.03.2013

Տեսակը Հիմնական
Կարգավիճակը Գործում է
Ընդունման վայրը Երևան
Ընդունման ամսաթիվը 28.02.2013
Ստորագրման ամսաթիվը 05.03.2013
Վավերացման ամսաթիվը
Ուժը կորցնելու ամսաթիվը

Կապեր այլ փաստաթղթերի հետ

ՀՀ ԿԱՌԱՎԱՐՈՒԹՅԱՆ ՈՐՈՇՈՒՄԸ ՀԱՆՐԱՅԻՆ ԳՐԱԴԱՐԱՆՆԵՐԻ ՀԱՎԱՏԱՐՄԱԳՐՄԱՆ ԿԱՐԳԸ ԵՎ ՎԿԱՅԱԿԱՆԻ ՁԵՎԸ ՍԱՀՄԱՆԵԼՈՒ ՄԱՍԻՆ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

28 փետրվարի 2013 թվականի N 187-Ն

ՀԱՆՐԱՅԻՆ ԳՐԱԴԱՐԱՆՆԵՐԻ ՀԱՎԱՏԱՐՄԱԳՐՄԱՆ ԿԱՐԳԸ ԵՎ ՎԿԱՅԱԿԱՆԻ ՁԵՎԸ ՍԱՀՄԱՆԵԼՈՒ ՄԱՍԻՆ

«Գրադարանների և գրադարանային գործի մասին» Հայաստանի Հանրապետության օրենքի 8-րդ հոդվածի 1-ին և 2-րդ մասերին համապատասխան՝ Հայաստանի Հանրապետության կառավարությունը **որոշում է.**

1. Սահմանել հանրային գրադարանների հավատարմագրման կարգը և հավատարմագրման վկայականի ձևը՝ համաձայն NN 1 և 2 հավելվածների:
2. Հայաստանի Հանրապետության մշակույթի նախարարին՝ սույն որոշումն ուժի մեջ մտնելուց հետո եռամսյա ժամկետում հաստատել հանրային գրադարանների հավատարմագրման հանձնաժողովի աշխատակարգն ու անհատական կազմը:
3. Սույն որոշումն ուժի մեջ է մտնում պաշտոնական հրապարակման օրվան հաջորդող տասներորդ օրը:

**Հայաստանի Հանրապետության
վարչապետ**

S. Սարգսյան

2013 թ. մարտի 5
Երևան

Հավելված N 1
ՀՀ կառավարության 2013 թվականի
փետրվարի 28-ի N 187-Ն որոշման

Կ Ա Ր Գ

ԳՐԱԴԱՐԱՆՆԵՐԻ ՀԱՎԱՏԱՐՄԱԳՐՄԱՆ

I. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով կարգավորվում են հանրային գրադարանների կարգավիճակ տալու ընթացակարգի հետ կապված հարաբերությունները:
2. Հանրային գրադարանների հավատարմագրումն իրականացնում է Հայաստանի Հանրապետության մշակույթի նախարարությունը (այսուհետ՝ նախարարություն)՝ «Գրադարանների և գրադարանային գործի մասին» Հայաստանի Հանրապետության օրենքին (այսուհետ՝ օրենք) և սույն կարգի պահանջներին համապատասխան:
3. Հանրային գրադարանների կարգավիճակը հավաստվում է վկայականով (այսուհետ՝ վկայական) և հավատարմագրման գրանցամատյանում (այսուհետ՝ գրանցամատյան)՝ գրանցումով:
4. Հավատարմագրման գործընթացն ապահովվելու նպատակով Հայաստանի Հանրապետության մշակույթի նախարարի (այսուհետ՝ նախարար) հրամանով ստեղծվում է հանրային գրադարանների հավատարմագրման հանձնաժողով (այսուհետ՝ հանձնաժողով) և հաստատվում դրա աշխատակարգն ու անհատական կազմը:
5. Հանձնաժողովն իրավասու է քննարկել սույն կարգի համաձայն իրեն ներկայացված փաստաթղթերը և տրամադրել եզրակացություն հանրային գրադարանի կարգավիճակ տալու կամ մերժելու վերաբերյալ:
6. Նախարարությունն իր պաշտոնական կայքում տեղադրում և յուրաքանչյուր ամիս թարմացնում է հավատարմագրված գրադարանների վերաբերյալ տեղեկատվությունը, որը պետք է ներառի՝
 - 1) գրադարանի անվանումը.
 - 2) գրադարանի գտնվելու վայրը.
 - 3) վկայականի համարը, տրամադրման տարեթիվը, ամիսը, ամսաթիվը.
 - 4) հեռախոսահամարը և էլեկտրոնային փոստը:

II. ՀԱՎԱՏԱՐՄԱԳՐՄԱՆ ՊԱՀԱՆՁՆԵՐԸ

7. Գրադարանը կարող է հավատարմագրվել և ստանալ հանրային գրադարանի կարգավիճակ, եթե համապատասխանում է «Գրադարանների և գրադարանային գործի մասին» Հայաստանի Հանրապետության օրենքի (այսուհետ՝ օրենք) 8-րդ հոդվածի 3-րդ մասի դրույթներին:

III. ՀԱՎԱՏԱՐՄԱԳՐՄԱՆ ԴԻՄՈՒՄԸ ՆԵՐԿԱՅԱՑՆԵԼԸ ԵՎ ԴՐԱ ՔՆՆԱՐԿՄԱՆ ԳՈՐԾԸՆԹԱՑԸ

8. Հավատարմագրման վկայական ստանալու նպատակով գրադարանը (այսուհետ՝ դիմումատու) դիմում է նախարարին՝ կցելով սույն կարգի 7-րդ կետի պահանջները բավարարող հետևյալ փաստաթղթերը՝
 - 1) իրավաբանական անձի կարգավիճակը հաստատող պետական ռեգիստրի գրանցման վկայականի համարը.
 - 2) տեղեկույթ տպագիր արտադրանքի և այլ տեսակի փաստաթղթերի դասակարգված հավաքածուի (իրականացված հաշվառման, ստեղծված գրադարանի տեղեկատվական համակարգի) մասին.
 - 3) կազմակերպության տարածքի (սեփականության կամ վարձակալության կամ անհատույց օգտագործման իրավունքով) նկատմամբ իրավունքի պետական գրանցման վերաբերյալ փաստաթղթի պատճենը, ինչպես նաև տեղեկույթ գրադարանի գործունեության համար համապատասխան գույքի կազմի և տեսակի մասին.
 - 4) տեղեկույթ ֆինանսական ապահովվածության և ֆինանսավորման աղբյուրների մասին.
 - 5) տեղեկույթ նախարարի հրամանով սահմանված գրադարանային աշխատողների մասնագիտական որակավորման չափանիշերին համապատասխան որակավորված մասնագետների մասին.
 - 6) տեղեկույթ գրադարանից օգտվողներին մատուցած գրադարանային ծառայությունների մասին, այդ թվում՝ ֆիզիկական սահմանափակումներ ունեցող անձանց համար.
 - 7) տեղեկույթ միջգրադարանային բաժնութային համակարգից օգտվելու մասին:
 9. Դիմումն ու կից փաստաթղթերն ընդունում և գրանցում է նախարարության աշխատակազմի համապատասխան ստորաբաժանումը (այսուհետ՝ ստորաբաժանում)՝ էլեկտրոնային եղանակով՝ համաձայն գործող օրենսդրության:
 10. Սույն կարգի 8-րդ կետով նախատեսված փաստաթղթերից որևէ մեկի բացակայության, ինչպես նաև դրանց՝ Հայաստանի Հանրապետության օրենսդրության պահանջներին չհամապատասխանելու դեպքում ստորաբաժանումը հինգ աշխատանքային օրվա ընթացքում դիմումատուին տեղեկացնում է բացակայող կամ պահանջներին չհամապատասխանող փաստաթղթերի մասին և առաջարկում է երեք աշխատանքային օրվա ընթացքում վերացնել թերությունները:
 11. Սույն կարգի 10-րդ կետով սահմանված ժամկետում դիմումատուն փաստաթղթերի թերությունները չվերացնելու կամ ներկայացված փաստաթղթերն օրենքով սահմանված պահանջներին չհամապատասխանելու դեպքում դիմումը մերժվում է:
 12. Ստորաբաժանումը երեք աշխատանքային օրվա ընթացքում ուսումնասիրում է դիմումատուի ներկայացրած փաստաթղթերը և երկու աշխատանքային օրվա ընթացքում նախարարին գրավոր տեղեկացնում է հանձնաժողովի նիստ հրավիրելու անհրաժեշտության մասին՝ կցելով ներկայացրած դիմումը և կից փաստաթղթերը, ինչպես նաև ուսումնասիրության արդյունքի մասին գրավոր տեղեկանքը:
 13. Նախարարը հինգ աշխատանքային օրվա ընթացքում հրավիրում է հանձնաժողովի նիստ, որը քննարկման

արդյունքում եզրակացություն է տալիս հանրային գրադարանի կարգավիճակ տալու կամ մերժելու վերաբերյալ:

14. Սույն կարգի 13-րդ կետով նախատեսված եզրակացությունն ստանալուց հետո ստորաբաժանումը երեք աշխատանքային օրվա ընթացքում նախապատրաստում է նախարարի հրամանի նախագիծ դիմումատուի դիմումը բավարարելու կամ այն մերժելու վերաբերյալ նամակի նախագիծ՝ դրան կցելով դիմումը, կից ներկայացրած փաստաթղթերը, դրանց ուսումնասիրության մասին տեղեկանքը, հանձնաժողովի եզրակացությունը և նիստի արձանագրությունը:

15. Նախարարը երեք աշխատանքային օրվա ընթացքում հանձնաժողովի եզրակացության հիման վրա հրաման է արձակում հանրային գրադարանի կարգավիճակի տրամադրման կամ նամակ ստորագրում մերժման վերաբերյալ:

16. Ստորաբաժանումը երկու աշխատանքային օրվա ընթացքում նախարարի հրամանի մասին գրավոր ծանուցում է դիմումատուին կամ ուղարկում նամակը՝ կցելով հանձնաժողովի եզրակացության պատճենը:

IV. ՎԿԱՅԱԿԱՆԻ ՏՐԱՄԱԴՐՈՒՄԸ ԵՎ ԳՈՐԾՈՂՈՒԹՅԱՆ ԺԱՄԿԵՏԸ

17. Ստորաբաժանումը նախարարի հրամանի հիման վրա երկու աշխատանքային օրվա ընթացքում պատրաստում է վկայականը և ներկայացնում նախարարի հաստատմանը:

18. Վկայականը նախարարի կողմից հաստատվելուց հետո համապատասխան ստորաբաժանումը մեկ աշխատանքային օրվա ընթացքում վկայականը գրանցում է գրանցամատյանում և այն հանձնում դիմումատուին: Վկայականը տրվում է 5 տարի ժամկետով:

19. Վկայականի գրանցամատյանի ձևը և վարման կարգը հաստատում է նախարարը:

20. Վկայականի կորստի կամ վնասվելու դեպքում գրադարանի դիմումի և գրանցամատյանի տվյալների հիման վրա տրվում է նույն համարով և գործողության ժամկետով նոր վկայական՝ վերին աջ անկյունում «Կրկնօրինակ» նշումով:

**Հայաստանի Հանրապետության
կառավարության աշխատակազմի
ղեկավար**

Դ. Սարգսյան

**Հավելված N 2
ՀՀ կառավարության 2013 թվականի
փետրվարի 28-ի N 187-Ն որոշման**



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՄՇԱԿՈՒՅԹԻ ՆԱԽԱՐԱՐՈՒԹՅՈՒՆ

Հ Ա Վ Ա Տ Ա Ր Մ Ա Գ Ր Մ Ա Ն Վ Կ Ա Յ Ա Կ Ա Ն

N 00000

Տրված է _____ 20 թ.

հրաման N _____

Գրադարանին

_____ (իրավաբանական անձի անվանում)

_____ (իրավաբանական անձի գտնվելու վայրը)

Հանրային գրադարանի կարգավիճակ

Գրանցված է _____ 20 թ.

Տրվում է 5 տարի ժամկետով:

Հայաստանի Հանրապետության
մշակույթի նախարար _____

(ստորագրությունը)

_____ (անունը, ազգանունը)

Կ. Տ.

**Հայաստանի Հանրապետության
կառավարության աշխատակազմի
ղեկավար**

Դ. Սարգսյան